

摘藻堂四庫全書薈要

集部

欽定四庫全書薈要

集部

御選元詩卷二十一

詳校官原任主事臣李斯咏



欽定四庫全書薈要卷一萬八千四百三十三

集部

御選元詩卷二十一

五言古詩十

陸廣

與金伯祥虞克用清夜聯話

浩蕩即扁舟  
紆徐適廣路  
元雲蔽重陰  
澄湖莽洄客  
雁度寒洲漁  
罾挂荒墅故人欣  
會面握手出深悰  
古篋啟奇文  
微吟發清趣  
念茲慎勿忘  
勗哉紀良晤



邵光祖

宿良夫契友山齋

晏坐南窓下愛此池水平  
餘霞飲夕景百喙鳴秋清  
衆星疎以淡缺月倚空明  
塵襟豁蕭爽愈覺身世輕  
蓬瀛亦伊邇遐念殊凡情  
視彼區中聚鼯睡何由醒

陸繼善

題趙榮祿水邨圖

青山迷遠近蕭條古郊墟  
側逕深且窈中有幽人居  
短

籬門半掩竹樹相扶疎平疇涵白波淺渚漲綠蕪何人  
泛扁舟似欲相招呼誰令破幽寂驚鴻起寒蘆此意胡  
可言會心寫成圖撫卷空歎賞悠悠水雲孤

張常明

次徐良夫謝雲林倪處士耕雲王照磨韻

清溪雨初歇爽朗氣如秋顧我蕭閒者悠然一虛舟愛  
此山色佳崔嵬翠欲流適與畊漁子心意俱休休看雲  
投澗壑擷芳度汀洲行吟時岸幘坐憩或科頭尋真披

密篠寧辭道路脩忘形諒莫逆同氣欣相求勝槩夙所  
聞茲來遂遨遊才思慚予劣文章羨子優已知樂放曠  
且復為延留襟期本冲澹情話幸綢繆興來哦新詩况  
有鳥聲幽還邀望湖月重上臨溪樓

陸侗

綠雲洞

雲林氣蒼寒百年老禪宅清冷簷蔔香太古蔚藍色金  
鐘有時振珠露不住滴朝來自研朱重將梵音譯

張體

送張吳縣之官嘉定分題得琴臺

靈巖鬱嵯峨上有古琴臺天光瀉石面月色流翠苔冥  
冥煙鶴唳渺渺松風哀彷彿清商奏仙人騎鳳來雲旌  
卷絕壁祖帳行瓊杯願言宓子賤去邑更徘徊

錙堪

擬古

千金買明珠百寶裝帶鉤寶帶綰同心明珠垂兩頭美

人結新歡託體相綢繆再拜稱主壽持以奉千秋

毛翰

春日有懷仲遠徵士二首

抱病惜芳景衡門掩春風  
乾鵲似相語飛飛鳴屋東  
唼唼不少休趣我步庭中  
鵲去故人至手持書一封  
問荅未及竟遠道情已通  
開械感鵲意含笑歸房櫳

鏡湖不可去還憶夏蓋湖  
其源翳林麓其隰散荷蒲  
扁舟四五客美酒一百壺  
狎弄魚鳥間簸蕩雲水區  
放情



恣游泝忘彼形勢  
途晚尋煙中塢  
猶足憩斯須  
幽花列妓女  
明月侑盤盂  
長嘯來天風  
濯足亂江鳬  
庶幾永終日  
聊樂以為娛

郭完

方士志畊隱

雨衣製青荷  
雨笠編新籜  
斯人沮溺流  
日晏猶耕作  
今年擬有秋  
烹羊祭先穡  
招我食力徒  
斗酒聊取樂  
酣歌擊瓦盆  
昨晚牛生犢

余闕

送劉伯溫之江西廉使得雲字

祖帳依山館車蓋何繽紛使君驅駟馬衣上繡成文中  
坐陳綺席羽觴流薄薰情多酒行急急意促歌吹殷況我  
同鄉友同館復離羣初暘麗神臯遙望澄遠氛迴鑣望  
雙闕五色若卿雲蒼茫歲年徂東西岐路分道長會日  
遠何以奉殷勤惟有淩霜柏天寒可贈君

秋興亭

涉江登危榭引望二川流  
雙城共臨水兩岸起飛樓  
漢渚深初綠江臯迴易秋  
金風揚素浪丹霞麗綵舟  
登高及佳日能賦命良儔  
御者奉旨酒庖人供膳羞  
一為山水媚能令車騎留  
為語同懷者有暇即來遊

先天觀

仙客鍊金地蒼山深幾重  
至今龍虎氣猶在琵琶峰  
峰前石路整金澗垂楊嶺  
萬壑閱阿宮千年奉丹鼎  
日日采三秀人人吹玉笙  
既要王子晉復命董雙成  
方朔金

門步春來多自豫青鳥幾時還銜書寄君去北闕懷美  
祿南山思遠遊勞心如御水東去復西流

山亭會琴圖

連山環絕壑雲木亂紛披中有抱琴者有如榮啟期蕭  
然久不去問子欲何為

題劉氏聽雪樓

羣峰擁臨檻脩竹鬱菁菁蔭向曲池好聲惟雪夜清天  
寒三日卧人道是袁生

安慶郡庠後亭讌董僉事

亭名天  
開圖畫

鯨鯢起襄漢郡邑盡燒殘茲城獨完好使者一開顏省  
風降文囿弭節遵曲干雙池夾行徑累榭在雲間天淨  
羣峰出地迴蒼江環霞生射蛟臺雁沒逢龍山開樽華  
堂上命酌頻危闌主人送瑤爵但云嘉會難豈為杯酒  
謹樂此罷民安魄淵無恒彩清川有急瀾明晨起驂服  
相望阻重關

九日宴盛唐門

今日良宴集玉帳設金縣賓稱此嘉辰令德應重乾淒

淒秋陽升湛湛江景鮮西馳三涇津東瞻九華山文湍

帶粉堞卿雲覆綵旃清歌送銀爵汎此秋花妍嗟予遠

征人別家今四年采薇夜歸戍操築朝治垣微此一日

歡苦辛良可憐中觴感前課撫運當泰年燔柴盛唐郡

泛舟縱江前臨川射長蛟雄風推八埏豎儒繆從役任

重力廼綿武功既無成文德何由宣微勲儻有濟敢愧

魯仲連

雲松樓

初日高樓上卷幔對黃山黃山出霄漢爛漫發青蓮參  
差非一狀朝夕看屢妍九華承雙舄敬亭附駢筵漫漫  
雲幕嶺沈沈松覆泉清飈坐中起如聞帝女絃靜有幽  
事樂動無塵慮牽消搖悅心目茲道可長年

楊平章崇德樓

重城控秋塞丹樓耀芳甸頽霞上氛氲蒼林下蔥蒨長  
河城邊急積沮窗中見遠雁滅居延行雲歸鄯善大賢

謝卿相垂幃化鄉縣春蟲觸寶瑟餘花飄玉斫方從董  
園樂陋彼歌梁轉伊子去山澤寒齋秋草徧載覽登樓  
篇益重臨淵羨

賦得琵琶峰送人降香龍虎山

瓊峰毓奇態高高出先天柄超琳闕迴盤影淥池圓別  
檻標蒼樾回窗蓄紫煙淙流如度曲藤蔓似長絃肖像  
生儀始希顏太古前雖無羅袖拂常映礪花妍子有靈  
侯技能彈大道篇函香一臨眺天際意飄然



汪澤民

古詩二首

美人青雲端望之不得親贈我一端綺珍重同南金上  
有連理枝間以雙飛禽裁衣以被服報之綠綺琴衣以  
結綢繆琴以酬知音文采豈不貴尚絅思自珍雖敝不  
忍棄感子同一心

南山何崔嵬丁丁伐嘉木伐木將安施飾此輪與轂良  
材莫自致棄置河水曲黨人偷且閒不獲有餘粟況無

獵較功大庖有餘肉彼美蓬廬士薇藿不滿腹飢渴豈  
弗懷徒食乃所慙

陳肅

雜興

長安有高第云是金張家朱門映綠水弱柳啼春鴉曉  
合列侯馬暮多名主車可憐歌舞月空照玉梁斜  
驅車洛東北遙望首陽山昔有兩兄弟采薇於其間我  
願從之遊孰云不可攀躊躇日將暮感此空忘還

妾住雕陰東君去漁陽北惟有別時草依依滿行迹不  
忍行迹沒埽盡還更碧君情如妾意纏綿無終極

王翰

送別劉子中

執手寒江濱慷慨難為別豈無楊柳枝零亂不堪折鴻  
雁西北來嗷嗷唳晴雪陽和忽已暮旅況轉淒切誰憐  
蘇子卿天涯持漢節

途中

萬物皆有托我生獨無家蔓草野多露眇眇天之涯親  
戚不在旁更與奴僕賒落日下長坂悲風卷驚沙林依  
避猛虎郊行畏長蛇封狐逐野鼠跳踉當吾車村墟四  
五聚索莫集昏鴉方投異鄉跡又悲遠城笳撫劍向夜  
起中心鬱如麻微軀焉足惜天道良可嗟雲漢念乖阻  
道路日已遐去去復何極為君惜年華

題菊

我憶故園時繞籬種佳菊交葉長青蔥餘英吐芳馥別

來二十載粲粲抱幽獨豈無桃李顏歲晚同草木及茲  
覩餘芳使我淚盈掬離披已欲摧瀟灑猶在目雨露豈  
所偏歲月不可復歸去來南山餐英坐空谷

龍山月夜飲酒分韻得樹字

薄暮清興嘉涼風集高樹須臾明月生清光在尊俎池  
空河影涼石冷苔色古列坐當前墀杯行不煩舉野庖  
具山蔬稚子薦雞黍晴峰餘靄收密竹殘露滑驚鵲翻  
夜巢流螢墮前戶良時念睽離觸物感所寓坐待河影

流疎鐘繞林曙

陳謙

學士山懷古

枕湖列層岑蔥鬱聚雲族出郭纔三里方舟漸通麓曾  
邀昔賢賞名勝皆可錄雙峰夾亭榭崇阜富杉竹我家  
世結鄰數椽依古木懷欽索遺址半與松根伏碑缺篆  
無存揣文須穆卜坡仙豈遂往或寓幽人屋據梧緬高  
風秋陰吹肅肅

李祁

同孫彥能遊山菴

緣崖涉清泚披草得幽逕蕭條雙檜閒獨立一松勁入  
門聽微鐘心垢一時淨向來飽干戈棟宇兀偏正空庭  
鳥雀喧壞壁龍虎瞑徒能起咨嗟無復聳觀敬三歎復  
出門乾坤幾時定

一鏡亭夜坐

靜夜臨深池蕭條不成寐蟾光上下浮清颺左右至潛

魚既息波幽鳥亦斂翅仰視河漢明悠然發深喟

陳基

秋懷

寒暑有代謝人事亦推移蹉跎慨疇昔俯仰念復茲  
籬落委秋蔓餘葩含夕姿物化諒難窮吾生知有涯  
皎皎碧山侶依依青桂枝相逢恐遲暮悵望起遐思

秋夜何迢迢迢迢不能寐起坐彈孤琴寫此千古意  
鳴鳳久寂寥猗蘭亦顚顚往聖既莫作後賢孰當繼  
獨憐



商山翁去去復遐逝空谷亦何有紫芝聊可餌如何末  
路中亦隨留侯計羽翼儻不成鴻鵠將垂翅苟可利生  
民寧辭暫紆轡區區後世名於翁胡足記

羣動夜已息秋聲適何從仰視天宇高微雲浩無蹤明  
月在庭戶河漢上橫從既莫知所始何由究其終我獨  
弦我琴微風入疎桐寫作清商調感激意無窮

昨日苦炎暑端居厭煩渴手短河漢高井深轆轤折此  
夕秋已清一洗塵世熱紈扇委深笥輕羅換疎葛天運

無停機人生自悲悅急景一以遷流芳遂哀歇洞庭生  
微波明河湛初月落葉辭故枝驚鴻亦飄忽為謝同心  
友胡為久離別

我有一樽酒獨飲不成歡豈無骨肉親悠悠隔河山亦  
有平生友合并良獨難古人千載上世遠不能攀何如  
與明月徘徊松桂間月既知愛我流輝照衰顏我亦知  
愛月託心同歲寒長願玉宇淨河漢生微瀾四海仰餘  
照親友各平安夜夜見明月人人無苦艱此月不可負

此樽不可乾天地等逆旅流年劇驚湍古人雖云遠其  
言若芝蘭舉觴以和之對月更盤桓

大江

夏后道九川江源起西極想當疏鑿際毫髮無遺力奔  
流赴東海吐納潮與汐萬古天塹雄洶湧限南北時秋  
八月望煙霧四開闢皓月麗中天華星列東壁俯擊亂  
流檣仰送搏風翮眼空牛渚舟氣傲南樓席平生臨深  
戒所至每兢惕此夕獨踈狂四顧無與敵風伯引輕帆

百怪皆辟易  
前瞻狼五山  
亭亭倚秋碧

如皋縣

曉行過如皋  
草露淒已白  
井邑無人煙  
原野有秋色  
緇褐兩三人  
牢落徒四壁  
似訝官軍至  
拱立衢路側  
伊昔淮海陬  
土俗勤稼穡  
瀉盡桑麻閭  
閻皆貨殖  
及茲值兵燹  
道路分荆棘  
十室九逃亡  
一顧三歎息  
王師重拯亂  
主將加隱惻  
戒吏剪蒿萊  
分曹理鹽筴  
眷眷恤瘡痍  
遲遲歷阡陌  
上天合助順  
九土期載闢  
白首忝戎行  
臨

風增感激

令丁鎮

水路轉下樂遠赴令丁鎮落日淡平蕪荒邨帶寒燐平  
時富魚稻稅薄民不困蓮芡亦時豐足以禦饑饉江湖  
歲或艱老弱行蠹蠹相攜就淮食不得辭遠近四野今  
盡荒百畝無一壟鞠為鳬雁區無復限封畛師行輜重  
隨士飽筋力奮經費固有常變通亦宜論吾聞古賢將  
羊陸開吳晉食足邊備多高標邈千仞

聽歌水調有感

江流清復清江草接江亭何人歌水調餘韻入青冥歌  
者不知苦聽者有餘情坐令離別客白髮鏡中生

塘西

牽舟復搖櫓日出還亭午風遞五林秋雲挾塘西雨盈  
盈採蓮將坎坎迎神鼓對此欲忘歸停橈更容與

鳳口

溪塢晚含風山營夜依谷棲鳥息復驚歸雲斷還續畫

舸止宵征連艫銜尾宿戍鼓雜鳴茄秋聲一何肅

東塘

輕舟下溪口却轉東塘路雞犬近相聞漁樵遠城戍雖  
經喪亂後漸有承平趣處處白蘋花家家紅槿樹

龍橋婦

婉孌龍橋婦空閨何惻惻夫婿弱冠餘南征死鋒鏑但  
見鄰人歸不知夫蹤跡委身奉舅姑誓志如金石朝采  
陌上桑暮向窗間織織成錦回文無處寄消息織成雙

鴛鴦無復合歡夕何如織縑素裁剪信刀尺為舅作衣  
裳為姑易飲食

夏夜懷李尚志

蟋蟀已在壁煩暑猶未歇離居感時序憂端難斷絕綠  
樹含微風明河湛初月念子行未歸徘徊至明發

聽寧上人彈琴

忽忽歲將晏鬱鬱不自聊況茲霜露集驚飈振寒條之  
子從何來攜琴過衡茅為我理素曲五音紛以調莊聽



斂手衽幽憂為之消  
鸞鳳戲雲中餘音相與飄  
別鶴警宵露衆葩悅春朝  
婉麗不可極忽復變蕭寥  
清風散六合白日耀層霄  
流水一何深泰山一何高  
聘魯慨觀樂適齊感聞韶  
疇知今日樂俛仰千載遙  
寤言欲報之愧乏英瓊瑤

雲文閣為鄒伯常賦

公子愛脩潔宴坐焚椒蘭  
朱火生青煙綢繆升博山  
喬雲成五色佳麗不可殫  
忽然為芝蓋輪囷殊未闌  
輕風

散紛郁流芳花竹間曲戶春窈窕綺疏日闌珊霏霏縈  
舞袖歡樂有餘閒

待王子充未至

屏跡遠城闕幽棲向林阿永懷同心友褰衣起婆娑憶  
昨走京邑彌年阻關河結客燕趙間頗覺增悲歌逸驥  
謝羈紲冥鴻辭網羅所念聖哲遠中心良匪他夏屋蔭  
嘉木芳池發新荷須君此弭節日夕共委蛇

饒介

送秦文仲博士還三沙

東望大瀛海影落扶桑弓三洲直如矢正射三山中三  
山負曉日曉日波浪紅仙人不騎鶴所適多御風秦君  
家三洲長與仙人通即之不可見忽爾能相面翩翩頭  
上巾舉舉塵中扇高談清溽暑知子不貧賤閒居寡良  
儔有酒不自薦此日亦足醉況得邦之彥小醉須解醒  
大醉不用醒平生慎許可祇有一劉伶太湖三萬頃七  
十二峰青頗貽山水秀閉門脩酒經白雲生硯石疎雨

灑窗櫺子上三洲去手杯猶未停

張憲

汎舟黃顙湖望梅山

汎舟黃顙湖望見梅仙山嵯峩結寶髻晶森浮銀灣長  
風蕩青蘋雪浪相飛翻魚龍現怪誕水怒山自閒詎知  
神靈意在虛無間緬思學仙尉一去何時還幽姿不  
可見高風邈難攀落日動簫鼓把酒酬潺湲

臨安道中先寄賽景初

朝入臨安山暮上由拳嶺周道無行蹤晴空斷飛影嚴  
關固高柵疊嶂列危屏荒坳斜日淡虛市野煙冷息肩  
坐茂樹瞑目發深省何事馬蹄塵兵鋒迭馳騁

我有二首

我有駢角弓百步能破的力強不受檠材美陋越棘時  
能斃飛將萬騎莫敢逼翻翻鐵絲箭剌剌金爪鎬鼓寒  
霜氣重應手響霹靂豈惟射渠魁眼中已無敵雄哉兩  
橐鞬儼若左右翼時來亦大用不偶直暫塞我弓雖少

金  
卷二十一  
置未許楚人得

我有雁翎刀寒光耀冰雪神鋒三尺強落手斷金鐵在  
昔臨元戎志在除草竊怒來死不顧決眚肝膽裂老蛟  
遶腰卧夜枕寒泉冽維時誠汝賴豈忍時暫輟中途偶  
棄置竟踐秋扇轍塵埋土花暗繡澀神氣滅思之終永  
傷默坐慘不悅敢忘漢宣詔不負呂虔說金風吹秋郊  
賊馬政侵軼又當攜汝去舊義未遽絕莫瑩鷓鴣膏恐  
汚荆卿血

席上

彼美瑤林姬綠雲何盤盤清歌珠落斗妙舞玉成團風  
急酒暈薄月斜花露寒翦燈續殘醉把袂接餘歡雖非  
長夜飲猶勝萬錢餐

汶陽道中

汶水東入海疾流無已時可憐齊與魯荒草秋離離日  
澹野水黃風高木葉飛繫舟閒弔古不覺淚霑衣

任城道中

客行魯橋道路出毒山驛驅車上坂坂歇馬道傍石雨  
來松樹暗風起荷葉白一笑歎浮生胡為倦行役

陳秀民

灤陽道中

晨出建德門暮宿居庸關風鳴何蕭蕭月出何團團短  
轅駐空野悲笳生夕寒我本吳越人二年客幽燕幽燕  
非我鄉而復適烏桓前登桑乾嶺西望太行山太行何  
盤盤欲往愁險艱寓形天壤間忽如水上船役役何所



求吾將返林泉

燕京客舍送友歸天台

雁鳴沙漠風秋入燕陵樹客子衣裳單寧不畏霜露驅  
車國東門迢迢懷往路尺璧橫道周誰能一回顧登山  
豺虎雄入海鯨鯢怒天台隔三江丹霞夾元霧黃精或  
可尋胡麻庶當遇明時有遺佚歸哉保貞素我馬病已  
久東西厭馳驚逸駕如可攀吾將執其御

劉仁本

續蘭亭會補參軍劉密詩

并序

庚子春仁本治師會稽之餘姚乃相龍泉之左麓  
州署之後山得神禹祕圖之處水出巖罅潄為方  
沼疏為流泉卉木叢茂行列紫薇間以竹篁仿佛  
乎蘭亭景狀因作雩詠亭以表之合甌越來會之  
士得四十二人同脩禋事取晉人蘭亭會圖詩缺  
不足者各占其次補四五言各一首因曰續蘭亭  
會云

陽春沐膏澤草木生微暄靈圖發幽祕感此禹迹存衣  
冠繼芳集臨流引清樽性情聊自適理亂復奚言

述言

膠柱難鼓瑟甚者當解絃造車不合轍出門行莫前絃  
更紊古調車徒反舊轅姚虞世既遠雅奏不復宣姬公  
指南作矩度誰能傳

經營百尺構掄材須豫章驅馳萬里道駕馭必乘黃君  
看樗櫟姿擁腫誠匪良駑駘但芻秣不可以服箱工師

與徒御取舍當審將

楊維禎

送客洞庭西

送客洞庭西雷堆青兩兩陳殿出空明吳城連蒼莽春  
隨湖色深風將潮聲長楊柳讀書堂芙蓉采菱槩懷人  
故未休望望欲成往

淵明撫松圖

孤松手自植保此貞且固微微歲寒心孰樂我遲暮留

侯報韓仇還尋赤松去後生同一心成敗顧隨遇歸來  
撫孤松猶是晉時樹

題繆生佚寫林塘圖和倪元鎮韻

清流帶古郭中有射鴨堂苔衣畫壁澗石臺花雨香之  
子弄孤翰相見竹梧蒼思幽天機發慮清塵夢忘會須  
琴堂夜共宿破山房

芝雲堂分韻得對字

窮冬積繁陰快雨不破塊問途玉山下繫船桃溪滙主

人聞客來把酒欣相徠窈窕雙歌聲嬋娟兩眉黛談笑  
方云云妍媸各成態憶昔獻策時日炯重瞳對下馬宴  
瓊林宮花出西內俯仰三十年同袍幾人在明當理行  
舟天遠征鴻背那能事煩劇曉出星猶戴行當謝冠冕  
歸荷山陽耒

覽古

單父七絃琴為治務感興十金南門木立令務必行單  
父有成言夜漁若嚴刑南門能徙木不能徙民情以此

知巧信不如拙而誠

齊相善求治議論人人殊蓋翁本黃老一語蓋有餘諸  
儒不足聽醉吏自足呼醉吏獄不擾諸儒多詐狙

子陵江海客本非沮溺倫仁義立奇論豈果忘吾民狂  
奴作故態飄然歸富春客星犯帝座太史奏天文故人  
信符讖三公等浮雲

襄陽有高士生產不曾治何以遺妻子鹿門有深期藉  
籍齒牙論龍鳳名諸兒諸葛拜床下可是圯橋師

會稽嵇叔夜才氣浩不群平生癖於鍛餘好在琴尊不  
如一長嘯攜琴學蘇門可憐廣陵散奇弄今無聞

彈琴戴安道焦桐破奇聲蔚宗與文季俱以琴自鳴天  
子不得屈王公不能聆獨憐褚司徒銀柱老齊伶

我愛王懷祖面壁售人罵不比少掾時瞋目荅米價編  
中頗有容坦之詎能過桓桓大將軍漢業在出跨

青青五柳宅貧無三徑資去參建威幕為貧良亦非彭  
澤八十日胡為遽來歸乃知決然逝非為鄉里兒首惡



王休元酒亦無所辭華軒欲載我我心詎能違

錢惟善

對月酌酒

對月不飲酒何以陶吾生明輝散空白照我千載情  
泠然輒忘寐但覺風露清寒蛩雜羣籟天地皆秋聲  
流光不可駐長江終夜鳴酒盡月欲墮浩歌倚曾城

早起

披衣起危坐心清聞曉鐘流光入窗白月澹西南峰  
遊

魚躍風藻幽禽翻水松青山如膏沐遠樹煙為容舟人  
與漁子菰蒲深處逢

張昱

上巳日杭州府學教授徐一夔四齋訓導拉遊  
智果寺訪東坡題參寥泉

佳遊在上巳屬此清明前春景已云晏風光猶未暄往  
尋智果寺竟得參寥泉雲物豈殊昔人世自更遷邈哉  
長公詠高吟憶當年我輩復登臨花界何因緣古佛儼

香閣真詮積華軒境超萬念空道勝諸妄捐緬懷此會  
難徘徊未云還申章續芳藻冀或來者傳

妙高院大方屋上人

碧岑日在望雨雪阻登臨二客從事者扶藜長松陰綠  
雲及上方步履皆黃金佛香出寶閣一息契初心心如  
白蓮花塵垢何由侵攢眉入社後此會還可尋廬山得  
遠公法侶滿東林虎溪偶然事傳笑直至今我輩仍避  
俗屋師誠可欽

舟行即事

舟行如虛空上下天光裏中宵撤前幔繁星在清泚天  
河橫未落北斗當面指涼風波上來吹皺青天綺蘆洲  
集夜禽聒聒鳴不已惡聲雖擾眠清景則可喜却思車  
馬塵此時動城市

王逢

復如乾封晚經漁浦

窮腫經漁浦寒水白于練總總星東出獵獵風北轉眼

中獸蹄過笛裏魚狀變稍聞刁斗應漸喜煙火見誰家  
長林根繫艇沙渚面天含瀟湘思山錯吳越甸承平謝  
憂患少壯忘羈賤瓜橋往未遑雲源訪殊便明涉子陵  
灘桂酒同一奠

望江郎石

仲春天氣佳萬象欣改色我行六峯外遙見江郎石二  
儀闢混沌牽牛委晶魄鼎列台輔姿玉蘊珪璋德三神  
浮瀛海噴薄東一極鉅鼇因戴之仙宮晃金碧斯連厚

坤軸乃棄姑蔑域直上青蓮花或隕樵舍側安知非異境自與三神敵于時攬深秀雲霧忽巾幘微風稍飄颻空翠疑亂滴雜英敷陽豔嘉木生午寂交交黃鳥音好在千丈壁二年思晤對百里今咫尺煙波動落照道路陰已夕尚戀女媧功躊躇望西北

送楊子明知事從觀孫元帥分制沿江州郡

寒日動大江鞍馬散滄洲漚光滅沒外迴見冰梁浮壯士無人色旗羽風颼颼楊君志弧矢笑被黑貂裘祭輶

千仞岡掉鞅萬斛舟先聲掠淮甸遙制三邊州元帥統  
將權言責在軍謀一言闕興喪跬步分陽秋天地屬閑  
塞波伏蛟龍湫孤煙起天際薄暮青轉幽百里靜雞犬  
豈但窮兵由雪貿薺麥生猶聞鑄戈矛頻年竭土壤經  
時委川溝行其所無事彫瘵或少瘳耀德不觀兵當今  
第一籌君昔甚惻隱曲宥千俘囚歸裝輕于葉廉價重  
琳球敝邑蒙薦臨多暇獲讌遊鳳凰巢阿閣黃鵠宜遠  
投菜竹霜實繁知止疇與侔蘆根短刺水鷺斯空啾啾

顧予麋鹿姿蓬藿翳林丘行藏任本性道義期加脩

夜坐

落日秋氣昏回溪夜噴薄幽花欹露榭孤螢隕風閣  
沖襟謝煩歎廣簟生離索躑躅望明河南天正飛鵲

游鯉山

鄉山三十三游鯉奠郊南巍然獨高大秀掩東諸嵐  
土剛蓄炎精崖仄削劍鐔我嘗挹飛翠遠在滄江潭  
波濤與伏興雲霧相吐含恍然穆王駕八駿左右駮  
又如琴



高仙脚踏朝蔚藍久思更徽號新喜遂幽探太白賦九  
華後來成美談狂歌繼其武林間免愧慚春風綠瑤草  
秋霜紅石楠行將脩月斤為鑿避世龕蛟龍正格鬪鯢  
化誰其堪

趙善長山水

畫師今趙原東吳諒無雙寸毫九鼎重烏獲力靡扛翠  
樹擁羽旂深崦敞雲窗參差見壘笋不無酒盈缸老山  
石黃色插脚琉璃江隱若赤壁壘勢壓曹魏邦何當柔

猛虎蛟鱷遂我降  
欠伸列仙崖  
嚏咳漁蠻矸

戴良

詠懷三首

錄一首

少小秉微尚游心在六經  
苒苒歲年遲乃與塵事冥  
入秋多佳日何以陶我情  
園蔬青可摘新穀亦既升  
命室釀美酒一壺聊復傾  
兒女在我側戚還合并終  
觴無雜言但說歲功成  
至樂固如此是外徒營營

和沈休文雙溪八詠

登臺望秋月秋月光陸離掩映西南樓徘徊東北墀凝  
華奪班扇流輝鑒阮帷三五暈尚圓二八形已虧爰有  
蓬鬢人長懷桂殿思遼城記吟詠西園憶追隨願以薄  
暮景承君清夜暉

會圃臨春風春風弄新陽驅煙入閒戶卷霧出虛堂響  
谷鳥將韻穿林花度香逶迤動中閨駘蕩經洞房逐舞  
輕靡裊傳歌低繞梁所悲金玉軀遂爍佳麗場時拂孤  
鸞鏡星鬢視飄揚

秋至愍衰草衰草遍平陸方晨露染黃入夜風銷綠別  
葉有歸聲故蕊無留馥勁莖坐自摧寒叢竦如束彼物  
既如斯我年寧不促已失早生榮敢冀晚彫福何當即  
去茲縱浪從所欲

寒來悲落桐桐生在長林積葉既阿那攢條復蕭森排  
雲正孤立乘風忽哀吟朽壤方有託急霰非所任輪囷  
龍門側憔悴嶧山岑不求削成圭何待裁作琴菲薄既  
非材固無斤斧侵

夕行聞夜鶴鶴鳴向天池奇聲傳月迴清思逐風悲寥  
寥度霄漢噉噉傷別離華亭侶既失衛軒寵亦哀衛軒  
非我顧華亭尚余思蟋蟀悟寒候商羊識陰期不有慕  
類心此情那得知

晨征聽曉鴻鴻飛何處所隨陽弱水岸違寒長沙渚冥  
冥憶霜羣邕邕叫雲侶固將聯匹儔豈惟念羈旅視夜  
已昭晰度聲尚淒楚以之頻感觸將何慰艱阻帛書望  
不來誰知我心苦

解佩去朝市朝市路已迷敢冀恩私被但嫌朋好睽彼  
讒起青蠅我行玷白圭寸心幸能亮微命不終乖及今  
去青瑣何日瞻泰階荒服固云忝是道諒亦迷安得同  
志士三歎寫余懷

被褐守山東山東古於越州城冒陁峴嵐氣屢興沒剖  
竹曰有行思君不能發指塗期闌暑下車已涼月汲黯  
薄淮揚子牟戀魏闕豈伊念川塗固亦悲朝列日月儻  
垂照猶堪慰寂蔑

築新居

挈杖去中林卜宅江之邊江邊多故廬改築架斯椽左  
右皆廢墟南北盡頽垣昔人固不留遺跡尚依然因之  
悟物理盛衰恒遞遷世既異市朝海亦變桑田古來皆  
有是念此一長歎何以慰我懷斗酒傾前軒百世非所  
知聊且樂當年

還舊居

自我遠行遊故廬今始歸如何廿載間舊事都已非曳

杖過比鄰相呼尋故知不見垂白翁但見初長兒我園  
既稍葺我田亦就治種秫釀美酒拾薪煮豆糜一笑集  
親朋相從說睽離以之感疇昔俛仰多所悲人生一世  
中所憂渴與飢力耕給其用此外更何思便當息我駕  
皓首以為期

憶胡仲申

點點階上苔鮮鮮為誰碧已別舊年人空餘舊年色我  
行東齋外對之還爾惜所思雖久違猶有往來迹



城東會飲送王天錫

陰崖斂暝霏霜陸耀晴  
現蕭蕭落木多繇繇  
衰草遍開冬感徂物  
列飲會羣彥美醕溢  
流霞妍談粲餘綯時  
髦非我匹清尊豈余  
戀行矣送將歸悵焉  
罷歡宴引領阻雲從  
搔首歎蓬轉

題愛柏軒

瑟瑟涼野風竦竦寒  
城木風勁木亦然受  
命一何獨歲物已淪  
傷高標誰賞錄偶荷  
主人恩開軒向城曲  
老枝

扶戶吟密葉傳窗綠遂忘孤生悲行享後凋福有客正  
迷方振衣時躑躅願為柏上枝託蔭歸君屋

同子充濬仲遊北山夜宿覺慈院

窮年厭喧囂今晨愜游衍豈伊清曠懷直為朋知展指  
塗陽已升入谷光未顯涉流既百折尋山亦千轉停策  
樹頻倚攀林芳屢蹇路夷始出幽山暝復淩緬佛廬既  
棲薄僧榻聊息偃地僻心自怡俗遠慮乃遣明發有佳  
趣勝處將歷踐

贈別祝彥明

悵望臨荒蹊驅馳騁遐步江紆練月初山標綵霞暮天  
長路易迷水深舟難渡征人去不息倦僕立相顧此時  
悲送君安能髮不素

對雨金達可送酒至

星躔離夜月桂渚發朝雷族雲起泉室零雨下陽臺飄  
檐方似霧集地復如埃空濛迷野鷺霑灑滑階苔旅人  
乏愉悅孤館獨徘徊久缺清醑至忽值白衣來豈不欲

為酌因君停玉杯

徐叔度遺紈扇

團團七華扇名在制久缺感君裂紈素與愚却煩賜入  
手訝如圭映容疑學月翫之炎氣消握之微風發却願  
暑長在無使君暫歇

次韻宿西山

旦擢東湖溼暝策西山麓林光漏月清水影漾天綠初  
風革故和窮律轉新肅悲來攢人懷山房不成宿

治圃四首 錄二首

三春豐雨澤晨興觀我畦嘉蔬有餘滋草盛相與齊勦  
力治荒穢指景光已西好月因時來歸路杳然迷暮鳥  
尋舊林晚獸遵故蹊我亦息微勞去去安吾棲

長夏罕人事齋居有餘閒北窗多悴物且遂灌吾園攢  
根既舒達積葉亦蔥芊瓜瓞繞畦長新葵應節鮮抱甕  
一圃視生意盈化先在我豈不勞即境多所歡悠悠千  
載間樊生信為賢

游吳山承天觀

石徑趨魏宮雲薨倚層壁昔聞帝子游今見羽人宅鱗  
居庭際擁蜃閣窗外闢複領曲且盤喬林隱復直路縈  
賞心侶谷館咀芝客既近已欣覲撫遠亦驚覲離離越  
樹青渺渺海門白乘風遲來潮倚月候歸汐徘徊憶天  
險俯仰誇地德于時將指使暫此盪塵臆豈無犬馬情  
終負煙霞癖何當解朝組相從隱仙籍

抵富陽宿縣治作

戾戾風蕩波鱗鱗雲出萼乘輶臨安道指景富春郭是  
節春已暮遙途寒尚薄升陽對人掩傾潤灑衣落解鞍  
憩危嶺倚劍望幽壑飢禽聲固慘哮虎勢尤惡既瞑入  
公署息念坐塵閣俯思還浦魚仰憶迴風鶴以之念鄉  
縣臨觴不能酌

游東湖

漾舟疑港斷進帆喜湖廣境麗趣非一路迷心已往雲  
峰互稠沓煙波紛滉漾梵宇浮鏡入琳宮躡屏上浪起

孤嶼沈水落衆山長隱隱草畔堤悠悠蘆際榜幽懷自  
此多客情復誰獎身固脫虞弇心猶寄塵網安得超世  
姿來縱山泉賞

游大慈山

水行境謂盡陸出路旋通乃即蒼松徑步入青蓮宮連  
嶂既蓄萃密林亦蔥蘢地涉清淨界身游紫翠重臨流  
翫廣沼金石眺奇峯寒鏡湛秋夕碧玉劃晴空蘭若與  
年峻象筵緣教崇謁祠慨卿相尋僧叩禪宗契理已無



像觀念豈有窮願絕區中緣永依塵外蹤嗒然遺身世  
年齊天地終

贈別汪定海二首

錄一首

故人忽已別兀兀吾何適莫投甬東路不見往來迹古  
寺靜脩廊空齊冷虛壁獨有階上苔猶如舊時碧

龜毛廬

倦游去朝市委懷在田園既悟執戟疲益知荷蓀賢夙  
晨飯牛出夕曛負耒還春作固云力秋歛耒盈廬求羸

豈其願拙業乃所安不見龜上毛成羶亦良難

對春雪寄梧竹翁

常時寒已收今茲陰尚結惜此艷陽天盡付蕭騷雪穿  
花適自亂雜雨詎成潔獨有灞橋人詩思益清絕

舟次高錢遲孔昭不至詩以速之

屢約湖曲游良辰輒蹉跎及今風雨夕一葦凌寒波遙  
遙度墟里靡靡轉坡陀暫息泉上樓倚闌頻嘯歌此時  
知心友愆期在山阿儔侶俟之久不至復如何

湖上對雨有懷天淵老禪

空濛暗遙甸  
淅瀝響高樹  
乍縈林表來  
復灑重湖去  
瀟瀟孤興發  
望望寒川暮  
念與道人期  
雲深不知處

顧瑛

玉山佳處以愛汝玉山草堂靜分韻得靜字

蘭風蕩叢薄  
高宇日色靜  
林迴汎春聲  
簾疎散清影  
褰裳石蘿古  
濯纓水花冷  
於焉奉華觴  
聊以娛晝永

以丹桂五枝芳分韻得五字

南州孟秋月維日二十五迴風吹層霄飛雲過疎雨客  
從金華來款曲置樽俎況有匡廬仙貌古心亦古襟期  
事蕭散笑傲忘賓主哀絃發清聲修眉善鼓舞秋輝能  
娛人夜色滿庭戶脩脩風葉鳴泫泫露花吐春波杯中  
月不照墳上土緬懷琦龍門扁舟下南浦

以夜闌更秉燭相對如夢寐分韻得夢字

涼風振林木惻惻初寒動肅客桃花源張筵鳴玉洞落  
日照金樽飛雪棲畫棟談元味妙理謔咲雜微諷取琴

雪巢彈共聽金石弄嘉會固難并聚散恍春夢明發大  
江舟天閣孤鴻送

余與楊君鐵崖別兩年矣庚寅嘉平之朔君自  
淞泖過余溪上適永嘉曹新民自武林至相與  
飲酒芝雲堂明日鐵崖將赴任曹君亦有茂異  
之舉同往武林信歡會之甚難而分攜之獨易  
安可不痛飲盡興以洗此憤憤之懷因以對酒  
當歌為韻賦詩如左于匡廬屬瑛序數語為識

江空暮雲合歲晚雪霰多佳人美無度嚴裝徑相過夜  
宴芝雲館明發玉山阿繁聲落虛溜急袖翻迴波客有  
子曹子調笑春風歌歌終易離別別去愁蹉跎相思梅  
花發不飲當如何

以滿城風雨近重陽分韻得滿字

西風吹長江舟楫幾欲斷仙人遠方來羽服自蕭散頗  
言官軍中殺賊盡左袒時艱會面難取醉那容緩菊開  
重陽花對酒莫辭滿賡歌雜絲竹言笑亦侃侃月明梧

竹閒夜色良可款

以紅藥當堦翻分韻得翻字

靈雨沐霽景初暎散朝暄林鶯弄餘春砌藥開當軒  
泫妝露泥泥舞袂風翻翻流光不我邁久懷遲君論于以  
樂樽壘于焉傾笑言

遊天池

縈紆白雲路窈窕青山聯秋風吹客衣逸興良翩翩捫  
蘿度絕壁躡磴窮層巔崖傾石欲落樹斷雲復連兩峰

齟牙門中谷何廓然大山屹堂堂直欲摩青天小山亦  
磊落飛來隨其前陰陰積古鐵粲粲開青蓮神斧削翠  
骨天沼涵靈泉玉龍抱寒鏡倒影清秋縣憶昔張貞居  
寄我琳琅篇逝者不可作新詩徒為傳舉酒酌白日萬  
壑生淒煙幽歡苦未足落景忽已遷美人何不來山水  
空清妍

顧元臣

芝雲堂分韻



今日新雨霽山光靜如沐晚香浮水花秋聲在庭竹高  
堂張綺席談笑皆雍穆興酣雜觥籌詩成粲珠玉清時  
多遺才白駒在空谷今者不為樂逝者良不復嗚嗚咽  
洞簫裊裊度清曲更待月明生金尊照醺醪

顧晉


以愛汝玉山草堂靜分韻得草字

客從桃源遊愛此玉山好清文引佳酌元覽窮幽討流  
鶯荅新歌飛花落纖縞分坐有雜英醉眠無芳草

御選元詩卷二十一

謹案第十八頁前三行何事馬蹄塵刊本事訛庸  
據玉筍集改

[illegible]



總校官庶吉士臣侍朝

校對官檢討臣蕭九成

謄錄監生臣周元

欽定四庫全書薈要

集部

御選元詩卷二十二

詳校官原任主事  
李斯咏



欽定四庫全書薈要卷一萬八千四百三十四

集部

御選元詩卷二十二

五言古詩十一



倪瓚

春日雲林齋居

池泉春漲深徑苔夕陰滿  
諷詠紫霞篇馳情華陽館  
晴嵐拂書幌飛花浮茗盃  
下松粉黃窗間雲氣暖石梁  
蘿薦垂翳翳行踪斷非與世  
相違冥棲久忘返

雨中寄孟集

英英西山雲翳翳終日雨清池散圓文空林絕行履野  
性夙所賦好懷誰共語燒香對長松相與成賓主

聽袁子方彈琴

蕙帳凝夕清高堂流月明芳琴發綺席列坐散繁纓迴  
翔別鶴意縹緲孤鸞鳴一寫冰霜操掩抑寄餘情

贈天寧福上人

荆溪霜落後銅官日出初自櫛頭上髮更理篋中書上



人從定起詠言方繞除邇遁發微笑幻身同太虛

奉謝張天民先生

鳴雁將北歸裴回舊棲處江湖春水多欲去仍回顧  
稻粱豈余謀矰繳非所慮猶為氣機使暄冷逐來去  
寥寥天宇寬彼此同一寓風萍無定踪易散聊為聚  
君看網中魚在疚猶相煦

蕭閒館夜坐

隱几忽不寐竹露下泠泠青燈淡斜月薄帷張寒廳  
躁

煩息中動希靜無外矚  
窅然元虛際詎知有身形

雙寺精舍新秋追和戎昱長安秋夕

秋暑晚差涼茗餘眠獨早  
清風振庭柯寒蛩吟露草  
晨興面流水西望吳門道  
不知人事劇但見青山好

述懷

讀書衡茅下秋深黃葉多  
原上見遠山被褐起行歌  
依墟里間農叟荷篠過華林  
散清月寒水澹無波  
遐哉棲遁情身外豈有他人  
生行樂耳富貴將如何

丙子歲十月八日夜泊閭門將還溪上有懷友

仁陸徵君

明發辭吳會移舟夜淹泊空宇垂繁星微雲暝前郭沉  
沉抱沖素悄悄傷離索歸埽松徑苔遲君踐幽約

戊寅十二月丹丘柯博士過林下賦詩次韻酬

荅

積雪被長坂卧痾守中林山川雖云阻舟楫肯見尋傾  
蓋何必舊相知亦已深驚風飄枯條清池冒重陰聯翩

雙黃鵠飛鳴綠水潯  
顧望思鬱紆衷回發悲吟  
願言齊羽翼金石固其心  
歡樂何由替黃髮期滿簪

送馬生

送子淮南行繫舟江岸  
柳翠影舞晴烟落我杯中  
酒舉杯向落日春水浮天  
碧時見白鷗飛雪光翻綺  
席應笑披羊裘獨釣江邊石

寄李隱者

南汀新月色照見水中蘋  
便欲乘清影緣源訪隱淪  
君

住鈿山湖綠酒松花春夢披寒雪去疑是剡溪濱

題畫贈岳道士

義興岳道士野鶴如長身我知彌明徒不是侯喜倫結  
喉吟肩聳鐵脊霜髯新手中石棊子頭上漉酒巾久居  
離墨山自謂無懷民喪亂不經意松陵留十旬香雲作  
輿衛長松為主賓既滋數畦菊復種二畝芹樂哉以忘  
死道富寧憂貧為我具舟楫相期桃花春

對酒

題詩石壁上把酒長松間  
遠水白雲度晴天孤鶴還虛  
亭映苔竹聊此息躋攀坐久日已夕  
春鳥聲闐闐

尋友人不遇

洲渚多落英汴流尋遠山  
輕舟載美酒搖蕩綠波間  
俯詠拾瑤草遐思隘塵寰  
黃緣忽失遇悵望遂空還

池蓮詠

迴翔波間風的歷葉上露  
清池結素彩華月映微步  
雲陰花房歛雨歇芳氣度  
欲去拾明璫踟躕惜遲暮

徐氏南園對雨

櫻桃花欲落風雨暮淒迷  
忽憶郊園日竹林通磳西  
弱蔓滋野援蘭葉長芳畦  
念我當時友蒿萊沒舊蹊

題畫贈九成

故人郊掾史邀我宿溪船  
把酒風雨至論詩煙渚前  
晨興就清盥思逸愛春天  
復遇武陵守共尋花滿川

早春對雨寄懷張外史

林卧苦泥雨憂來不可絕  
掀帷望天際春風吹木末  
飛

蘿散成霧細草綠如髮念子獨高世南山脩隱訣撫弄  
無絃琴招邀青天月神安形不凋跡高行自潔思之不  
可見飢渴何由歇願為鸞鵲翔南游拂松雪

送甘允從北上

翔鴻縱高姿流水去不息枉道別友生揚舲望京國婉  
變前途憩蕭條餘景匿神京衣冠會左右金張宅驅馬  
流星繁垂軒春霧集嘉子玉質朗早通金閨藉行逢明  
主顧入補詞臣職束帶向晨趨陪讌終日昃芳年易為



晚所願崇令德英英白雲飛渺渺青山隔秋風應節起  
萬里思親客遲子返舊居銜杯數相覲

秋夜

空林溽露氣踈鐘時獨聞清夜息羣動高居無俗氛恬  
淡誠吾事榮名非所欣樂哉詠王風忘年棲白雲

十七日過與之洛澗山莊留宿復大雪作及明  
起視戶外巖岫如玉琢削竹樹壓倒徑無行蹤  
飄瞥竟日至暮未已雪深尺餘賦詩留別

世途縈荏苒歲晏不如歸密雪竹林夜挑燈共掩扉稍  
移神慮靜高詠元言微遇此巖中賞初心悵多違

送高太守之秦郵

秦漢置牧守猶古之侯伯封建而郡縣仁政固不易漢  
宣知所本留意二千石慎哉高侯車願循古轍迹

郊韶

分韻得寐字

清江下斜日水落鴻雁至方舟蕩文漪葭蒹新霜委岩

岩玉山岑溟溟薄雲氣沿洄入林塘池館翳幽邃羣公  
欣盍簪稱觴有餘思人生當盛年感彼鴻鵠志擊節歌  
慷慨厭厭夜忘寐

湖光山色樓

茲樓俯吳甸百里見虞山雲歸飛鳥外帆落大江間河  
源或可到星使幾時還因尋種桃者繫船清溪灣

玉山佳處分韻得玉字

逶迤玉山阿窈窕桃花谷林芳綴丹葩霞彩散晨旭溪

迴濯新錦洞幽荅鳴玉樂哉君子遊予以寄高躅

聽雪齋分韻得興字

玉山何逶迤積雪徧行徑池閣生漣漪林木發澄瑩於  
時接芳筵遐眺復觴詠歌停花入檐笛奏魚出泳若人  
多雅懷起舞屢清興言歸夜未央微月逗初暝

有懷玉山次沈自誠韻

亭亭古崑丘上有瓊樹枝仙人居其間服食忘神疲朝  
馭羲和車夕詠金臺詩我嘗與之游中夜夢見之御風

周八極迴焉人世違青雲忽氤氲白鶴長鳴悲以茲嬰  
世網一隨東海涯安得浮丘公挾舟候安期

姚文奐

玉山佳處分韻得汝字

仲春會桃源青年映霞舉道人吹鐵笛主者捉玉麈野  
航晨不渡溪漁來何許欹坐蟠根陰匡廬故仙侶衆賓  
各雅興辭適忘爾汝懷哉張李輩明月在空渚復念東  
海迂雲林夜來雨

婁東園分韻得四字

至正八年夏六月日踰四故人海上來  
勿游若雲萃置酒婁東園清陰障囂  
譚鋒落秋霜炎飈變涼思盤餐雜蔬果  
令舉飛觴至豈無絲與竹相與樂文字  
西亭及野航於焉得晚蒞新題到畫壁  
草木亦蔥翠浮生一萍流懽會良未易  
載歌秋水篇周還緩歸轡

題倪元鎮雲林圖

昔從雲林游靈光散霞外迴薄萬古情  
逍遙五噫態臨

流以濯纓息陰為解帶浩歌激清商參參動天籟

呂誠

庚申夏四月登玉山頂時雅上人適遷華藏於  
塔院歷覽終日而返是夕宿友人家燈前聞雨  
援筆有感

曉出城西門蕩漾官河艇朝光散晴旭露氣擁高迴潮  
上洲渚沒棹發六飛騁前岑獻竒狀心目快引領青山  
如故人登陟在俄頃嗟哉二三子憐我足力逞捨舟入

蒼翠一逕林木靜陰蘚護危棧古藤落簪井映帶列檜  
杉青黃熟梅杏古師安禪處神物伏精猛山靈詭異工  
幻蹟一埽屏孤塔劫灰餘傲兀立峰頂後巖古華藏稍  
復毘盧境汎觀盛衰際何物得修永道人出迎客一笑  
具羞茗清談竟終日毛骨灑然冷羣鳥亦知還微陽下  
西嶺遙歸弗成寐張燈酌南廔急雨何方來清聲雜蛙  
黽鄙言詎成章聊假管城穎

懷友



長夏夜景靜齋閣臨前池當簷素月流舉扇涼颼吹參  
差丹棘花婀娜絲連枝玉人美無度耿耿勞我思

周砥

桃溪泛舟

放舟千山裏嵐氣滿晴川歌辭理白雪水禽棲綠煙蒼  
蒼野陰變蕭蕭風景妍尋僧轉回塘望雲極遙天萬事  
寧有素一行忻偶然

擬古

迢迢遠別離相去幾萬里月照魯陽關風吹漢江水宵  
夢不可託路迷復中止登山還有屐涉水亦有舟我心  
如懸旌搖搖獨無休常恐瑤華落春風不能留豈君弗  
識察故此長悠悠安得白鸚鵡銜書東海頭

翡翠棲蘭苕鴛鴦上錦機物固各有類寸心獨何依春  
色來幾日海燕忽雙飛迎風不須入塵滿青樓扉

春雪

瑤葉綴元圃玉羽翔伊川翻雲九霄下呈芳二月前低

徊隔簾翠玲瓏入綺錢欲消不自駐已斷復成連珠幃  
凝華潔花池舞影妍相思梁園暮曾賞雒城年

風雨用高季迪韻

貧富不相值哀榮固有時行哉徒自速止尼未為遲崎  
嶇千萬塗辛苦豈要辭風雨羣鷄鳴壞屋起晨炊一日  
不解醉千古有遺悲如何屠釣人敢為帝者師

讀書

讀書易為感時節已徂秋行游固可適歲月懼不留高

齋曠而寂人務罕相酬千載事了了寧不慕前修道在  
無今古天運每周流萬理由我具消搖極冥搜為樂不  
在茲況復儲怨尤予本楚狂士意氣邁九州偶然似有  
契持身寓林丘萬鍾非所辭一毫非所求

新柳

纔弄新春色已有縈愁意欲倚不成眠待扶還似醉疎  
雨飄枝濕暮雀銜花墜脈脈獨含情故園那得至

題倪雲林畫

雲木蔽清野，峩峩橫素秋。一雨過大壑，百川會新流。未  
能聞至道，寧即歌遠游。歲晏且歸去，采芝南山幽。

擬古

翠管鳴春暉，瑤箏弄秋月。孤鸞忽驚飛，哀吟中夜發。鄭  
衛久足貴，正始誰復陳。若無琴與瑟，寧知古風淳。

別君能幾時，秋葉忽辭柯。蟪蛄已在戶，流螢亦渡河。感  
物抱悄結，容華恐蹉跎。黃鵠飛青雲，游魚潛綠波。豈不  
懷契闊，慰此離恨多。明月照機杼，不織鴛鴦羅。

漢宮起秋風美人感團扇寒帷坐遙夜含愁獨長歎桃  
李笑白日垂楊拂青絲既受春風榮芳菲同一時苟欲  
令偏瘁造化庸可欺願君心如日照物無恩私

張簡

春日齋居即事

垂簾覺春靜水檻幽情多蘭香舞雙蝶淥漲浮羣鷺  
皦晴雲度輝輝野氣和新柳帶長坂飛花泛輕波閒居  
違佳景芳菲俱凋訛忽忽已初夏綠暗青山阿

初夏偶成

清風度虛閣，飛花集羅幃。  
方欣晝晷永，不覺春光歸。  
鳴琴發逸響，嘉樹含清輝。  
幽情多默悟，淡景寧相違。  
覽書感澄寂，獨閉南齋扉。

題趙彥徵畫

吳興佳山水，遠近蓄清光。  
岌崿金蓋峰，秀色獨蒼蒼。  
煙雲互出沒，草木生風香。  
長橋接迴溪，積石倚崇岡。  
樵漁識徑幽，於以樂深藏。  
擊鮮列魴鯉，啟翳理松篁。  
晨雨沉

可鉏春泉亦堪湘既已長子孫所願安是鄉嗟哉風塵  
中何由得尚羊趙君鍾祁秀揮灑發奇章卷圖思舊游  
掩抑不能忘

送王子充歸金華

春入長洲苑東風已及時苑中垂楊樹吹作黃金絲送  
君出春城艤舟折柔枝以此聊贈遠相別仍相期君歸  
金華山當逢牧羊兒毋因入山去遂爾來遲遲楊柳飛  
花日待君同賦詩



閱真誥

長史昔好道鍊真三秀峰夜感紫薇仙降集華房中鸞  
鳥鳴素月翠旂颺閭風摘辭託諷寓讚揚皆真宗中有  
餐霞人可以回嬰童刻之白玉檢藏之華陽宮真人有  
仙氣乃得探其踪我生慕元素無由啟愚蒙嘯詠金玉  
章靈音朗九空懷仙起冥想颯然精靈通焉能出囂滓  
歛忽驂雲龍

李瓚

春夜懷豫章倪中愷并太原王本中二子皆客  
京師故詩及之

耿耿春夜永迢迢更漏殘美人隔千里清月在江關舉  
杯不能樂援琴孰為歡悵望五雲外目送雙飛翰王子  
經緯學紬繹茫無端倪生富文史落筆迴狂瀾古劍沒  
豐城太璞昧荆山奇材每不識萬古一長歎而我困畎  
畝漂流吳楚間釜魚獨恒飢衣鷄每懷殫慷慨念二子  
頻年事征鞍庶幾抱瑟心不愧齊門彈

江蒲送別

協風吹冰泮水色微茫綠沙融文禽集波暖白鷗浴之  
子逝將別分手愁局促離觴一何頻征舸嗟去速今日  
江蒲東明朝關山北棹歌不堪聞悽然淚盈掬

李元珪

春日訪雲林隱君倪元鎮

往歲暮幽隱茲晨適雲林倒屣荷主意下榻情何深取  
琴為君彈唐虞有遺音感子曠達志滌我塵凡襟雨過

池草生窗虛松竹陰倚檻俯流水開軒聽鳴琴芳春集  
嘉讌酒至還自斟愛客畏言別維舟睇遙岑

南昌諸郎立春次日邀飲江閣

置酒宴江閣濟濟皆郎官素心偶相愜氣味如芝蘭東  
風奏微和晴雲靄林端美人歌白雪玉筍行春盤焉知  
千里客共此一日歡夕陽下西麓徘徊更凭闌

高晉

碧梧翠竹堂分韻得草字

蘭堂俯清池，虛楹麗華藻。流雲度高梧，書帶生春草。嘉賓式讌集，幽懷為傾倒。清歌一徘徊，涼月翠屏小。

岳榆

春暉樓分韻得藥字

張筵池上樓，屬詠堦前藥。翠雨帶煙濃，紅雲倚風弱。睠茲廣陵情，慨彼溱洧謔。媚景當一酬，洗盞宜更酌。

彭采

送丁好義

晨登吳王臺蒼然望八荒大江東南去浮雲西北翔中  
有鷄雛飛前隨雙鳳凰梧桐正蒼翠亦待鳴朝陽白露  
湛清秋山花已黃黃折之欲相贈歲晏同幽芳

袁嵩

可詩齋

玉山何迢迢池臺隔煙浦相望伊永懷於焉得佳聚清  
才誰匹儔高情邁今古浣花溪上春夢草池頭雨緬思  
江右謝載念韋曲杜於以陶性情橫琴聊自鼓

唐元

虞山秋夜

迢迢秋夜長青燈半明滅棲鵲遶疎枝濕螢依腐葉谷  
空振幽響室靜生虛白數聲誰家笛吹隋西窗月

東臯

暄晨步東臯春風襲杖屨溪流帶落花晴煙裊飛絮濯  
足竹邊泉散策松下路幽禽忽驚起飛過溪南樹林深  
疑無人俄聞響機杼

顧達

綠波亭

碧色漲春雲  
圓文生暮雨  
稍停楊柳岸  
已沒鷄鵲渚  
錦鱗唼萍游  
蘭棹隔煙語  
曲闌倚東風  
懷人渺南浦

浣花館

密葉晝沉影  
落英春洗香  
白雪紛渚亂  
錦雲緣岸長  
尋津速去路  
懷人贈遺芳  
元洲諒非遠  
樓臺煙霧藏

漁莊



洲迴集芳氣流水蕩晴暉西風橫笛坐明月棹船歸緣  
渚葭莢靡近人鷗鷺飛緬懷浮家去薄暮情依依

春草池

浮颺偃蘭薄飛煙生水漣紅沾雨花濕翠侵衣桁鮮翡  
翠晚迷徑蜻蜓酣倚船援筆攄藻思臨流懷惠連

陸仁

春還軒

陰陽無停運太極體自常始復天地樞日月天地房凝

寒一已消煦煦春載陽曲塘魚上冰層漢雁北翔潛心  
驗物候齋居情味長容色當少壯豈不惜流光流光不  
待人撫時且徜徉

舒頔

看書

一日不看書此心若有失看書心未已細字費目力六  
經皆糟粕中有味如蜜古來聖與賢孜孜復汲汲流傳  
百世下相見不相識今人不如古古人豈今日時還看

我書撫卷三歎息

賦詩

一日不作詩此心成渴想非闕賦性癖只為薄技癢六  
義起商周漢魏相倣倣下逮唐宋間聲韻迭清響于馬  
觀治亂豈直事標榜窮幽與曠達俱屬浩氣養要當搜  
神竒後世知音賞

古松

偃蹇歲寒姿盤屈當虛樗蒼皮絡紫蘚翠色搖青冥中

藏六月雪下伏千載苓酷暑亦何畏隆冬愈加青老骨  
存蛟龍繁枝庇林垆不幸失所依流禍延丙丁恩深感  
雨露猶足揚王庭天風西南來慎勿驚山靈

白槿花

素質不自媚開花向秋前澹然超羣芳不與春爭妍涼  
夜弄清影縞衣照嬋娟佳人分寂寞零落祇自憐鮮鮮  
碧雲樹皎皎萬玉懸朝開暮還落物理乃自然嗤彼擁  
腫木徒爾全天年

七佛菴三十韻

春色如多情陰雲貸游矚登臨不憚勞踣躄轉山谷石  
磴危欲歎梯身進恐覆松風響簫笙花露滴巾幅鑿鑿  
石齒連盤盤山脊伏初疑路不通似覺地可縮小憩林  
木深大觀天地育曠胸陵八荒舉手決四瀆歲暮歷險  
艱時危事幽獨情深山水佳興遣杖履復七佛菴先登  
一人泉可掬誓將寂滅心受此清淨福人世徒喧啾山  
門遠榮辱艱難慨諸僧落莫棲老屋江水清入懷淮山

翠凝目花陰覆層簷鳥語隔幽竹稽首幡幢翻升階路  
徑熟禪心絮沾泥世味蠟煮粥軍政期嚴明民風慕清  
穆既興楊朱悲復動賈生哭再上講經臺仍摳御風服  
凭高氣層層眺遠山矗矗石眼松絡根崖腰樹飛瀑一  
泓照鬚眉兩地映蘭菊骨蛻起塵寰性空悟機軸無心  
雲自飛得趣景何倏綠樹啼白猿青莎卧黃犢川原豁  
而開麻麥蔚以蓼游辰風日和行徑草花馥冥冥鶴歸  
來長嘯下山麓

頭陀廢寺

微雲漏疎雨春事將結束小徑敷落紅長條已棲綠行  
行扣禪關寂寂欹老屋犬吠知客來巖棲見僧獨漣漪  
漾方池青蔥鬱嘉木立教雖尚空存心未脫俗於世竟  
何裨零落歸山谷極樂迷羣生無生惑三竺風光慰羈  
人聊此寓游目

閒步

和風漾晴雲約我散芒屨步出東南郊情景欣有託好

鳥鳴嚶嚶幽花淡漠漠平生江海交亂後半淪落惟餘  
白髮翁林下甘寂寞眼前兒與孫嬾惰不好學緬懷栗  
里人取醉聊自樂

周霆震

大風發屋雨雹交集

大風西北來屋瓦去如走麗譙雙闕壯關鍵決樞紐蒼  
蒼泮宮柏枝葉互紛糾移時折偃蹇巧力無措手西禪  
鐵浮圖摧仆如拉朽臨江戰樓飛夾巷坊額剖恍疑會



群龍奮發交怒吼泰山恐顏裂寧復計培塿老夫閉門  
卧雨電散窗牖倉皇正衣冠力疾坐良久天威俄咫尺  
性命亦何有默悟貴存心淵冰慎吾守

歲暮簡張梅閒

憶昔慕遠遊朝華沐春露焉知喪亂後林杪秋葉蠹間  
闕西州門寒日收踽步尚餘平生友示我廣平賦耿耿  
河漢輝幽幽冰雪度終慚媚求悅寧悔貞取妬朗吟發  
孤音明月落庭戶世事殊未涯歲年忽云暮有美君子

心永言金石固

濯濯江漢女

濯濯江漢女幽貞出良家十年守空幃夫婿天之涯良  
夜秉明燭悉心務絲麻憶昨秋風起河洛昏塵沙傷彼  
朱絲絃逸響趨淫哇朝為御溝柳暮作陌上花世態固  
應爾委置勿復嗟所悲在新春雨露凝朝華感此深閉  
門淵冰慮彌加藏玉萬仞岡守護盤龍蛇投珠千頃陂  
光燄驚魚鰕夫婿會有期豈問歲月賒寸心如皦日終

始宜無瑕

吳海

送傅德謙還臨川

傳君隘流俗舉步追古人  
古人去已遠斯道為荆榛  
出門抱高志區區向誰陳  
十年江海上漂泊但一身  
念我德不孤邂逅遂見親  
相知寧苦晚不覺逾三春  
精微共探討議論發清新  
誼合然諾重途窮憂思頻  
如何語離別使我意酸辛  
酸辛不在別欲留我何貧  
閩水東赴海

楚山西入秦春波正浩蕩誰能知其津

游七巖寺

羅田衆山中七巖獨高秀經營將半載宿願始得副緣  
雲攀鳥道十步九猷猷剛飈從北來巖谷盡號噉促步  
赴層巔依石避野燒鬱然煙燄交欸若雷電遠其勢吁  
可畏童僕盡驚走須臾得少息方覺性命有列坐咸自  
慶啗哉酌大斗陰陽却變化霏雨垂白晝癡雲迷海嶼  
昏霧失林藪歸途畏虎迹慘慘暝色厚幽懷莫能寫造

次宜自咎述此成短章聊用紀邂逅

夏日讌東臯亭

展席俯清池倚檻盼層巘  
苗綠滿平疇草秀被長坂  
風度荷氣清日移樹陰轉  
長嘯天為高汎觀心自遠  
良時會豈易莫待歲華晚

楊翮

送孔進道宰星子

素王有賢孫達尊在德齒  
爵膺天子命綰綬宰百里南

康控湖江屬縣望星子江右號囂譁斯地獨醇美帝眷  
禮義俗擇令煩為理惟君當厥任君志亦頗喜揚颿溯  
洪濤巨艦千圖史牛刀新發硎割雞聊用此撫字定多  
暇絃歌自今始廉車察殿最衡鑒在止水會採襦袴謠  
移書上風紀

春游次韻

白日諒難羈流光遽侵尋春風萬餘里觸景愁我心出  
門將何之高步凌嶇嶽欽纍纍丘冢間古木殊陰森昔賢

日已遠朱瑟尚遺音千秋百歲後有酒不可斟傷哉雍  
門語感之淚霑襟榮名安足羨行樂須在今夙興聽鴻  
雁嗷嗷尚哀吟

酬孔秀才

達人樂高蹈寒士耽遠遊遠遊欲何之禦冬無重裘棲  
棲道路間四顧誰與謀溫言忽相慰慶悵復焉求三復  
緇衣詩調高安能酬薄言寫心曲終覺懷慚羞

張端

和楊孟載對花五詠

種花

種花以娛情而必去惡草草惡人所憎不似花枝好莫  
教花易飛花飛迫人老歲晏孰能留行樂宜及早

看花

春風方袞袞春雨亦踈踈江南二三月好花無處無看  
花不知疲飲酒須百壺明朝酒重載紅雨落紛敷

折花



灼灼樹上花枝枝可攀折折以贈所思亦復自怡悅今  
日顏色好明日風光別年年送清明一樹東闌雪

買花

萬井夜雨歇一枕春日紅開簾買花看恰與去年同花  
枝固須好人生自飄蓬未信賣珠兒不作白髮翁

惜花

見花心目舒惜花懷抱惡日日池上行片片風前落盈  
盈一春愁脈脈無處託殘紅抱餘香遺恨芳洲泊

朱希晦

寫懷

巢居不厭客況乃佳客至  
擷蔬薦濁醪談經得真趣  
歸雲度遙岑斜日在高樹  
對飲須盡歡何時復相遇  
人生能幾何行樂貴適意  
不見萍與蓬飄飄無定處  
搔首仍踟躕臨風發長喟

甘復

道中

野風飄征衣野日轉空壁衆鳥號荒墟雜花翳叢棘路  
暗不逢人煙火望林隙

宿山家

木落秋滿山窗虛夜涼集風吹海月生露洗苔衣濕野  
客愛清冷長瓢暝中汲

晚至陳氏館

虛煙散華池高蟬暮聲咽落景對閒眠新秋入華髮素  
懷愜幽賞微颺灑林末為愛竹間涼相過步庭月

曉起

晨暉澹芳牖  
顥氣盈幽襟  
巖谷有秋意  
西風吹滿林  
獨擲高館罷  
暢游南澗潄  
漱齒掬寒瀨  
矯首望孤岑  
悠然釋百慮  
似得靜者心  
磴轉入茂樹  
衆山坐來深

晚出池上

遙嶺散夕雨  
掩書游方塘  
棲鳥喧幽林  
簷蛛引絲長  
木杪微風度  
颯然生早涼  
沿流弄潺湲  
倚竹聽琳琅  
丘園信為樂  
圭組永相忘  
落景送遐矚  
暢懷寓清觴  
但得寫

心素焉知兩鬢蒼

山堂詩為周伯清賦

清旭崇林坳疎籬翠澗上細路徑谷虛幽軒面林敞樹  
涼集鳴禽地遠謝塵鞅下手拂玉琴微風遞遙響冷然  
適素懷聊以寄心賞

曉出西園由谷中歸

披褐涉西園煩襟散清曉微風動高樹零露下芳沼始  
行幽谷中忽出青林杪流水漂餘花脩筠度啼鳥身緣

翠石迴思逐白雲  
香負杖歌賞懷春  
闌綠陰悄

留睿

寄遠

征夫往幽燕  
賤妾住吳越  
參商二十載  
綠鬢生華髮  
年望蜚鴻目  
斷愁不歇  
秋盡冬復春  
葉落花更發  
恨君顧妾身  
不如天上月  
月月行幾萬里  
東出復西沒  
天東出夜光  
夜光頻照妾  
妾容謾比花  
君情遽如葉  
念欲走從君  
河廣詎可涉  
燕趙多美人  
顏色皎如雪  
所樂在新知

誰復念離別雪性本飄蕩雪質易虧缺何如賤妾心不  
轉堅似鐵君看望夫石千載名不滅

余詮

春夢軒

池青草色暖蝶繞花枝滿花滿復花飛春歸蝶亦歸蝶  
歸春杳杳春夢何時曉推枕看東風幾人春夢中

周南老

芳桂塢

林塢藏幽芳叢桂團蒼玉子落明月中香生流澗曲風  
前隨粟金雨餘明淨綠伍以荃蘭幽愧彼桃李俗中有  
道人居清名記仙籙為花歌古香對酒不忍觸

董佐才

題華亭朱孟辨篆冢詩卷

古初無毫楮義畫何由傳孰知文字理已具河圖前神  
農洎蒼頡俯仰極人天穗書與鳥書創制分後先龜麟  
錫禹時盤銘著湯年岐陽紀石鼓史籀稱獨賢矯若蛟



龍蟠鬱若鎖鈕連科斗聿行漆形體因自然一從孔壁  
廢重為經籍憐秦相約籀古撰次蒼頡篇小篆遂名家  
勁健含姿妍登封及詛神金石紛雕鐫下逮隸八分變  
化如雲煙漢經煨燼餘文教仍敷宣保氏存六書學僅  
纔九千揚雄纂奇字杜林解探研繼蹟非無人意象莫  
不全偉哉許祭酒蒐羅歸簡編墜緒賴復舉後學知相  
沿陽冰克遠紹鉉錯造其元近代邵與周筆勢回奔川  
華亭朱茂才好古喜欲顛一掃世俗書習篆忘食眠秦

望并之采碧落兼新泉小者案間列大者屋壁懸平生  
囊橐貲多充買碑錢功深學既精齒壯志亦堅池魚染  
皆黑鐵硯磨將穿募捐累萬番期差古人肩師法正在  
茲什襲比蹄筌孫樵文自祭智永筆忍捐前修不我欺  
我癖尤難痊嗟我細林山上與浮雲聯譬彼汲冢書函  
之瘞其巔聚土封若堂剗石表為阡其陽碧樹交其陰  
書帶緣山靈謹呵護有名如有仙揮灑人間者顯晦名  
非偏寶劍賈胡發玉柙蔓草纏何如篆冢光夜夜映星

躔

華幼武

送族姪擴之通州

吾族最全盛家聲詩禮傳自遭喪亂後誰能事陳編猶  
子苦好學鄉閭稱獨賢文采珊瑚枝照映棠棣篇時同  
竹林會嘯詠相周旋一朝攜酒至別我荒城邊問渠欲  
何之言將適通川通川渺何許遠在滄海壖府侯朱夫  
子招我開講筵老懷極慰喜汝去毋留連吹噓千里外

感激故人憐脩程盡努力慎勿中道捐蛟龍起春雷鵬  
鷖搏秋天物遇各有時立功須盛年此行非草草著鞭  
宜爾先要登青雲路忠義尚勉旃舟發梁溪水帆拂狼  
山煙骨肉重相思兩地心懸懸長江浩無波擊楫秋風  
前行當賦清句懷此山中泉

次元輦見寄韻

通衢一傾蓋分手猶惜別況是忘年交離緒那可說蟬  
鳴野外秋雁叫沙頭月永保松柏姿同盟歲寒節

葉顥

題松雲齋十五韻

青松如舞蛟白雲如游龍龍游化甘霖與世為年豐蛟  
舞散清影利爪拏高穹二者無限奇盡入幽人宮幽人  
室懸磬隱約松雲中松秀悅耳目雲生盪心胸讀書坐  
雲石鼓琴雜松風無往不自得深喜世慮空披雲採松  
花何啻食萬鍾萬鍾食有盡松花味無窮松雲幸無恙  
天地同始終扶筇一相顧摩雲撫孤松問松幾何年適

與雲會同松靜了不言雲去尋無蹤回首萬峰頂但見  
山重重

三月望夕翫月

長空蟾吐魄良夜何團團皎如青銅鏡璨比白玉盤試  
浴海波底飛上青楓端徘徊嵩岱間宇宙生清寒神光  
常不泯留作千載看

讀書山月下

讀書山月下月色流巖扉松風吹毛髮草露濡裳衣研

精探元奧竭思窮幽微興亡空感慨今古誰是非孔孟  
幾千載斯文愈光輝蚩蚩愚下士去此將安歸

舉酒春風前

舉酒春風前勿訝衰顏紅藉茲麴蘖媒成彼醞釀功頓  
使鐵石腸化為歡悅容喜色浮鬚眉和氣填心胸浩浩  
六合間廣扇淳厚風兒女豈知此唯醉芳花叢

圍碁白日靜

圍碁白日靜舉袂清風吹神機衆未識妙著時出奇我

老天宇內白雪凝鬚眉坐閱幾輸贏歷觀迭興衰古今  
豪傑輩謀略正類碁局終一大笑驚起山雲飛

舞劍清夜闌

舞劍清夜闌孤燈耿中堂一舞空奸邪再舞摧豪強頻  
起為君舞月出雲飛揚氣衝牛斗暗影動蛟龍翔悲風  
轉蕭颯壯志彌慨慷時哉不可逢石匣深韜藏

東籬

曳杖東籬下層巒列環岫南山如有情青翠俯相就松



桂二老蒼煙霏乍無有孤雲屢出奇羣峰競呈秀圖彩  
寫晴嵐琴音漱寒溜采采黃金英芳香滿衣袖

秋懷次童中州韻

長空好明月燦爛今夕晴萬里皆月色四顧無人聲徘徊  
下青松照我茅屋明我望長歎息悠悠萬感生取杯  
挹清光和此松露傾嚙之清肺腑快我平生情

桂魄延秋景松飈生夕涼良宵兩相值蕭瑟流清光風  
聲驚客鬢月影照我牀徊徨不成寐轉覺歲月長起坐

問風月而我誰老蒼風靜月不言耿耿天中央

郭鈺

簡王志元

海月上蒼茫照我中庭正香霧出簾遲微風動花影冷  
冷綠綺琴拂拭塵埃淨一彈作新聲再彈成雅韻三彈  
曲未終感激誰與聽肅衿遲子來無負春宵永

同周愷子諒賦老人會詩

時危親戚散況乃多賤貧睠茲老人會為樂難具陳生

子競榮達志養俱獲伸朝出共寮案夕歸為比隣異姓  
歡愛洽不殊骨肉親起居迭相送惋愉盡情真繫我豈  
無母半菽長苦辛願言敷治化枯槁皆同春

早秋陪楊和吉曉登前山望桐江

白鶴導晨從涼颺起林杪振衣凌高岡極目窮幽渺蕭  
蕭草樹秋歷歷人煙曉依微元潭觀羣仙在林表下有  
塚累累世事誰能了桐江滙章水晴漲何渺渺曾不瞬  
息間一帶縈沙小無怪豪傑區煙蕪怨啼鳥盛衰兩相

乘元悟良獨少君今脫塵羈相從得閒眺題名剡石苔  
借蔭憩叢篠白紵含餘清稍覺心情悄山市門初開飛  
塵已紛擾

秋夕王楚善過宿

片雨灑空庭梧桐響殘滴窗戶涵清風孤燈夜寥闌渺  
懷平生親睽違不相識公子幸過從為之長歎息意曠  
塵慮空語到聰明入山徑披榛蕪晤言永今夕物變心  
自傷事往嗟何及遠大與子期無踵炎涼跡

劉永之

秋懷

涼飈振庭樹浮雲結重陰中情忽不樂拂几彈鳴琴  
冷多苦調零淚霑衣襟遠懷東都士登彼北邙岑  
悵然望京洛五噫發哀吟悠悠千載下誰識古人心

小澗讀易軒

環環碧澗連靡靡蒼山屬初日照林端春禽鳴布穀  
松深有去雲苔靜無來躡獨把一編書時向窗間讀

海屋為蕭君賦

結屋青海上弄影滄江涯手持翡翠竿誤拂珊瑚枝龍  
噓春霧合鶴度曉雲垂弱流幾清淺為書報安期

野老看雲圖

文湍激幽澗白雲流遠山偃仰長松下延眺一怡顏清  
風拂素服瑤花落樹間拾薪青煙際煮苓供晚餐耽此  
丘中賞竟日未言還

至正壬寅二月廿一日雍虞豈臨江宋某道士

劉旻李文同登西峯之煙雲臺以登高望遠為  
韻各賦四首

仙山百餘仞振衣聊共登陽林映昭晰陰壑瀉璵璠靈  
泓蟠玉虬丹萐冒翠藤霏霏縠霧歛冉冉卿雲升棲遯  
皆真侶擣揆盡高朋雖非幔亭會終使逸情增

炎運昔中否仙吏乃遁逃朝命三山侶夕謝九州豪碧  
壘儼遺躅杉桂若旌旄登覽值春晏微雨灑蘭皋俯窺  
石壁峭仰羨天路高媿無謝客才翰墨聊復操

素志抱冲澹每懷丘中賞茲山實靈異景物多清曠  
蜿蜒虹蒙垂瀑夫容開疊嶂丹柰遺嘉植青猿流哀響赤城  
如可希閬風遙相望聊為采真遊毋煩北山謗

結構陵紫煙玲瓏望青巘花開一水明松暝衆壑晚驚  
麝隱還見長蘿披復卷既同風中詠復此林下宴流眄  
屬淹延言歸猶繾綣誰言薄當世暫訢塵事遠

登煙雲臺同西峰諸友分韻得跨字

振策履崔嵬飛步凌雲榭俯觀飛鳥翔遠見平江瀉彈



碁古桂陰酌酒長松下谷響嘯哀猿林香過山麝祈靈  
醉巫覡尋真望仙駕翠虬金節導青鸞羽衣跨逸興殊  
淹留吹簫待清夜

題匡山石室

羣山爭盤紆衆壑盡奔放中峰最奇絕直立數千丈危  
構倚石壁面勢極弘敞心神坐超忽雲雨接惝恍山色  
晚更佳泉聲靜逾響猶言最絕頂臨眺極所往欲窮千  
里目更試九節杖

精廬極蕭爽乃在匡山涯  
鮮飈汎林木旭日生巖扉  
樵語隔煙小鐘聲出林遲  
階前百尺樹倒挂枯藤枝  
中有避喧者禪誦清四時  
挽蘿結幽珮紉葉為秋衣  
靜談遠公傳東林迹已微  
怡然契元理令我坐忘歸

擬古

南國有佳人秀色麗春陽  
素手弄機杼織綺向蘭房  
涼宵步玉堦羅襪霑微霜  
坐愁容華歇中宵理絲簧  
鳳笙歡未徹瑤瑟怨何長  
哀響激林木回車動華堂  
借問此

何曲新聲奏宮商東鄰有游子聞之感中腸願持五雜  
組繫君羅襦裳攜手共游衍卒歲以翱翔中情莫自致  
脈脈懷內傷

贈義士郭生

郭解古游俠然諾聞公卿片言苟相許九鼎相為輕操  
弓過洛社探丸出咸京寶刀酬劇孟白壁奉侯嬴去之  
千餘載君今振家聲襟懷還倜儻壯志復崢嶸脫略時  
俗子調笑狎羣英華筵間綺席甲第連朱甍駿馬桃花

色金羈翡翠纓良時事游冶南陌復東城一朝風塵起  
高義激中情傾家赴國難誓將斬鯢鯨長捐二千石遂  
長萬夫營營中燬羣盜隕垣委榛荆千金出私帑梁棟  
聿新成門廡既弘遠堂構復高明三軍盡鼓舞羣公亦  
歎驚由來豪傑士乘時樹勛名生當執金吾訓練羽林  
兵誰能對青簡齷齪稱儒生

感遇二首

腐鼠嚇鵲雛魚目欺明珠由來青雲士高視笑泥途廣

衢馳駿馬長戟夾高車光榮被九族氣燄陵萬夫祇言  
固恩寵豈悟有榮枯菴蔬生朱門鵬鳥瞰賓除徒聞黃  
犬歎千載為驚吁回視揚子雲獨守太元書

大道直如矢曲徑紆且盤舍車康莊內遵彼狹邪間狹  
邪多妖麗一笑好容顏金鋪間綺疏青樓入雲端羅袖  
為君開瑤琴為君彈明璫結綢繆魚水比交歡一朝青  
蠅至白璧生疑患恩愛在頃刻平陸起波瀾早合雖足  
貴中捐良可歎

同傳商翁何彥正舟中有懷辛好禮二首

浮雲無定姿青陽易消索渡口人獨歸雨中花盡落風  
急賈船稀春寒客衣薄所念同心友天涯尚漂泊  
沙際水痕交細草蒙茸長春江下連雁夜雨同孤舫佳  
期違宿諾歡笑懷前賞餘燼落寒燈卧聞漁版響

謹案第三十二頁前六行深喜世慮空刊本喜訛

嘉據樵雲獨唱改







總校官庶吉士臣侍朝  
校對官檢討臣蕭九成  
謄錄監生臣周元